

Lavurar sainza distracziun – ün luxus

Il cumponist e musicist Ramon Landolt e l'architecta Caterina Viguera sun ils prüms giasts dad «Artinresidenza Lavin». Il sogiuorn da duos eivnas vain realisà grazcha a raps vanzats da la società La Vouta chi'd es gnüda scholta d'incuort.

FADRINA HOFMANN

Ramon Landolt ha registrà suns e tuns da trais differents vadrets, tanter oter dal Morteratsch. Il scruschöz, guotöz e murmuröz dals vadrets ha'l arandschà in cumposiziuns. Dürant las ultimas duos eivnas ha'l realisà tschinch novas cumposiziuns e lavurà vi dad ün disc compact cun sia musica our dal glatsch. Caterina Viguera invezza s'ha dedichada a l'aua i'l spazi public. Ella ha fat retscherchas intensivias fin inavo pro'ls stüdis da Leonardo da Vinci ed ha experimentà cun origins e direenziuns da l'aua, cullas vias ch'ella tschercha e cul fat cha'l tun da l'aua as müda sch'ella vain sviada da l'uman. Ils resultats da la lavur da l'architecta e dal cumponist as poja vever e dudir in dumengia cur cha'l périn creativ driva las portas da lur atelier temporar illa chasa engiadinaisa a Suzöl 2 a Lavin.



Ramon Landolt (a dretta) ha cumpuoni tschinch novas tocs cun musica dal vadret. Aint il atelier temporar esa bier spazi e biera glüm – ideal per artistas ed artists. Caterina Viguera ha experimentà cullas vias cha l'aua tschercha sch'ella vain disturbada in seis cuors natural.

fotografias: Fadrina Hofmann

Ün allogi per persunas creativas

Ladina Campell es statta co-fundatura da la società La Vouta chi ha realisà dürant decennis art pitschna professiunala illa cuort da la chasa da Ladina Campell ed Andri Steiner. Las commembras ed ils commembars da la società La Vouta han decis a lur ultima radunanza generala da schoglier la società, adonta cha quella funcziunava bain. Motiv per finir d'eira la mancanza da temp da la suprastanza. Culs raps chi vanzan da La Vouta ha la suprastanza decis unanimamaing da scumpartir ils raps a persunas da l'art e cultura. «Nus lessan pussibiltar ad artistas ed artists in ün vast sen dal pled ün allogi da duos, trais eivnas per gnir a lavurar gratuita-

maing in quistas localitats», declera Ladina Campell.

Trais duonnas s'occupan uossa in fuorma da «società da suprastanza» sainza commembranza dal proget: Rhea Schudel, Jasmin Hauser e Ladina Campell. Ellas tscherchan ad artistas ed artists adattats pel sogiuorn a Lavin ed organischeschan quel.

Bandunar la rutina

Ramon Landolt e Caterina Viguera cugnuschan Lavin da vacanzas e cugnuschan eir a Ladina Campell. Els sun gnüts tschermüts da la suprastanza

sco üna sort «proget da pilot» dad «Artinresidenza Lavin». «Hozindi esa ün luxus da pudair lavurar sainza distracziun» disch Ramon Landolt. Cha güsta artistas ed artists chi fan diversas robas douvran ün rom i'l qual i's po as sfuondrar complettamaing. Davo duos eivnas in Engiadina Bassa constatta el cha'l lö saja fich inspirant ed el loda eir a la famiglia chi haja bivgnantà ad els uschè cordialmaing.

«Per nus es üna residenza la pussibiltà da lavurar da maniera ludica, da bandunar nossa rutina e nossa disciplinla professiunala», quinta Caterina Vi-



guera. La dumonda pro quist proget saja stat ingio cha üna architecta ed ün musicist as possan inscuntrar artistica-maing. El lavura cun tun ed ella cun spazi. Fingià dal 2023 e 2024 ha il périn realisà cumünavaelmaing ün pavigliun da suns cul nom «Encounter Ice Sounds 2.0». I's tratta dad üna installaziun illa quala i's pudaiva dudir la musica dal vadret in ün ambiant urban. Tanter oter s'haja düdi ad alugar al vadret. A Lavin ha l'architecta lavurà vi d'üna nouva installaziun da suns e Ramon Landolt cumpuona il sound per quella.

Bier spazi e biera glüm

Il local principal da la residenza a Lavin es ideala per lavur creativa. El spordcha biera glüm e bier spazi. Id es lö pel indriz da registraziun e cumposiziun dal musicist tant sco pellas fotografias e las skizzas da l'architecta. In dumengia driva il périn las portas da l'atelier per preschantar las lavuors in fuorma da tun e purtret. «Aua, exploraziuns sonoras – musica ed architectura» es il titel da l'ocurrenza. La preschantaziun cumainza a las 11.15 in La Stalla, Suzöl 2 a Lavin, e düra ün'ura. Davopro saja temp per discussiun e per ün eviva.